

Plenchi

Bèl a bati

TRINGG TRINGGG bèlèm..... TRINGG TRINGGG bèlèm.....

Nos a kana drenta aña 2019 ku positivismo, speransa i fé. Un aña kargá ku bendishon pa bo, bo famia i tur esnan ku bo ta stima. Plama amor den 2019, tambe pa deskonosinan. Aña 2019 a habri ku fiesta pa nos hubilarionan. Total nos a selebrá 1360 aña di trabou ku amor i dedikashon. Masha danki na tur nos dosente i personal di sosten pa nan trabou. Danki na nan famia tambe pa e kompartí nan ser kerí ku e organisashon edukativo katóliko.

Nos a kuminsá selebrá 100 aña Kolegio st. Famia tambe. Awe nos lo komparti algun potret ku boso di e promé selebrashon, un santu sakrifisio masha bunita mes den kua diferente dosente i eks dosente tabata presente.

Un felis fin di siman pa bo, tene duru na bo fé. Sobra lo bo haña di ñaña.

Riba roster

Nos ta pone nos hubilarionan awe riba roster. Un par di pòtrèt pa bo tin un bista di e selebrashon. Danki na tur ku a bini i espesialmente esnan ku a kontribuí na e dia. E motornan ta Rayla Constancia i Marianela Isenia di schooladministratie.







Not'é riba bòrchi

Kolegio Santa Famia a kumpli 100 aña di eksistensha. E direktor a tene un spich masha bunita mes ku nos ke komparti ku boso.

100 aña Kolegio Sta. Famia

Aña pasá nos a selebrá 100 aña di misa di Sta. Famia.

Ta konosí ku tur kaminda ku Iglesia establese, un di su preokupashonnan prinsipal ta enseñansa.

No por ta otro tampoko, teniendo na kuenta ku e mandato prinsipal di Hesus na su disípulonan tabata di bai i siña tur hende e loke Ami a siña bosonan.

Ora a kuminsá ku idea i konstrukshon di un misa pa e parokia nobo na San Mateo, esta Santa Famia a kuminsá tambe ku skol i e promé skol na Santa Famia tabata e skol parokial.

Kantidat di hende a krese i ya Awasá no tabatin bastante lugá pa muchanan di stat i di kunuku (manera tabata bisa e tempu ei) i asina dia 9 di yüni 1918 a kuminsá ku kobamentu di un skol pa mucha muhénan di e parokia nobo. Dia 22 di yüni 1918 sin e seremonianan kustumbrá a pone e promé piedra na un manera simpel.

Bendishon di e skol nobo ta tuma lugá dia 10 di yanüari 1919 (pues eksaktamente 100 año pasá).

E skol nobo aki ta konta ku 130 mucha partí den 3 klas.

Frater direktor di skolnan katóliko ta kabes di skol ambulante i tin 3 maestra:

- * Srta Estrelia Henriquez (3e klas)
- * Srta Gabriela Ditmar (2e klas)
- * Srta Antonia Grünings (1ste klas)

Skol pa mucha chikí ta habri dia 3 di febrüari 1919 ku srta Emilia Rooy na kabes ku masomenos 40 mucha.

Asina skolnan di Santa Famia ta kuminsá.

Mester menshoná ku no tin mucha hòmber, ya ku di rònt Kòrsou, e mucha hòmbenan ta bai St. Vincentiusschool, ku ta keda na entrada di hòspital banda di St. Thomascollege.

Na año 2004 direktiva di skolnan katóliko a klùster St. Willibrord College, Heilige Familieschool, Heilig Hart College, Heilige familie kleuter i St. Jozefkleuter i a bira Kolegio Sta. Famia.

E relashon entre iglesia, skol i kas ta di sumo importansha den formashon di un mucha. Mayor ta pone e promé piedra den edukashon i formashon i iglesia i skol ta sigui edifiká riba esaki. Nos ta kontentu ku den nos kaso nos tin sosten di mayornan i di nos pastor den esaki. Tur djaluna pastor ta huntu ku nos pa habri siman i tambe pa duna katisashi na skol.

Mayornan su tarea ta bira dia pa dia mas difísil mirando e influensha grandi ku por ehèmpel media sosial tin riba nos muchanan. Hopi bes nos mayornan ta traha mas ku un kaminda pa tene kabes riba awa, ku konsekuensha ku tin menos tempu pa eduká i forma yunan. Nos no por tapa wowo tampoko pa e preshon di grupo ku nos muchanan ta haña nan den dje. Mayornan su tarea ta birando difísil.

Skol su tarea tambe ta birando dia pa dia mas difísil. Si bo ke sa kon bo komunidad ta funshoná, djis drenta skol. Skol ta un refleho di nos komunidad. E problemanan ku mayornan i iglesia ta konfrontá nos ta mira bèk den nos skolnan.

Skol ya no ta un lugá di duna enseñansa, pero di formashon total di un mucha. Nos tarea na skol tambe ta birando dia pa dia mas difísil. Ya nos no ta solamente maestra, pero nos ta mama i tata, trahadó sosial, consehero di famia i muchu mas. Pesei mi ta sumamente orguyoso di mi tim ku kada dia ta lanta ku mes un amor pa sigui guia nos muchanan.

Na Kolegio Sta. Famia nos ke forma e mucha den su totalidat i ta sigui urgi nos mandatarionan, nos direktiva di skol, nos pastor, nos Iglesia Katóliko i nos mayornan pa yuda nos den esaki.

Nos mester di otro.

Si bo ke kana duru, kana bo so.

Si bo ke yega leu, kana huntú.

Laga nos no eduká nos muchanan pa ta riku, pero eduká nan pa ta felis. Di manera ku ora nan krese, nan sa balor di kosnan i no nan preis.

Laga nos siña nos muchanan kome saludabel. Nos por tin tiki pero nos por kome otro.

Sino despues nos tin ku uza remedi pa kuminda.

Laga nos siña nos muchanan pa stima nan mes. No ta solamente idioma i matemátika ta importante. Nos muchanan tin hopi talento ku nan no ta hasi uzo di nan. Ban yuda nan deskubrí nan talento.

Laga nos siña nos muchanan e diferensha entre un ser humano i ser humano. Ser humano dor di tene kuenta ku otro, stima otro, yuda otro, tolerá otro.

Laga nos siña nos muchanan ku nan ta stimá na nan nasementu i nan lo ta stimá ora nan fayesé, pero ku ta nan ta disidí i ta nan ta responsabel pa loke ku sosodé entre e dos momomentunan aki. Nos mester traha hopi duru riba e parti di karga responsabilidat di nos akto i akshonnan.

Mayor i èks mayornan, kolega i èks koleganan, alumno i èks alumnonan, pastor i sùrnan, direktiva di skolnan katóliko i tur ku semper a i ta yuda Kolegio Sta. Famia, di kurason masha danki pa tur boso amor, yudansa i sosten ku awe nos por inisiá selebrashon di 100 aña di Kolegio Sta. Famia.

Pabien na nos tur i ban sigui kana huntú pa por yega.

Indira Jansen, direktor di Kolegio Santa Famia





Mi ta konta

Brindis 2019 i homenahe na hubilarionan

Nos enkuentro di awe nochi ta den un espíritu festivo: ‘Jubileum cruiseship 2019’. E tema mes ta indiká ku nos ta habri 2019 ku ánimo pa alkansá frontera nobo, i ku gratitut pa tur e hubilarionan ku ta nabegando 25, 30, 35, 40, òf asta 45 aña kaba riba e laman ganchu di nos enseñansa.

Na tur hubilario, un kaluroso pabien ku e echo memorabel akí. Mi ta spera Dios lo bendishoná boso pa tur e añanan di dedikashon na adelanto di hubentut di Kòrsou.

Maske kada un di nos a trafiká su propio ruta riba e mapa di enseñansa, finalmente nos tur ta riba e mesun barko. P’esei mi ta spera ku ‘Jubileum cruiseship 2019’ lo resultá un berdadero Love Boat. Pasobra manera tur trahadó den e sektor di edukashon sa, amor ta un ingrediente indispensable pa kumpli ku tur reto i hasi un bon trabou.

Pa promové un relashon sano, konstruktivo i agradabel den nos skolnan, Direktiva di Skol Katólíko lo kontinuá e programa di ‘Restorative Practice’ ku a kuminsá aña pasá. E programa ta enfoká riba un ‘mindset’ nobo i ta promové formanan pro-aktivo pa evitá konflikto. Ademas ‘Restorative Practice’ ta stimulá dosente- i alumnonan pa traha ku otro i dialogá na nivel ora tin desakuerto tambe.

Den e konteksto akí mi ke referí na e dicho: “A glass can only spill what it contains”. Ku otro palabra: si bo stot un glas, ta loke tin aden so e por plama. Si ta limonada tin den e glas, ta limonada e ta plama. Si ta binager tin aden, ta binager e ta plama.

E dicho akí ta konta pa hende tambe. Ora bida sagudí nos, òf ora tin desakuerto, ta sali na kla loke nos tin aden. P’esei ta bon pa kada hende puntra su mes: Kiko mi tin den mi glas? Amargura i palabra duru? Of pasenshi i kompreshon?

Papiando di glas

Den espíritu di ‘Jubileum cruiseship 2019’, nos por hisa glas pa un brindis tambe. Mi ta proponé pa nos brinda riba un bunita kontinuashon di nos biahe den enseñansa, ku Dios todopoderoso semper komo nos lus di navegashon.